

Aida ĆORIĆ

**MUSTAFA TANOVIĆ: GRAMATIKA ENGLESKOG JEZIKA
Univerzitet "Džemal Bijedić" u Mostaru
Fakultet humanističkih nauka, MOSTAR 2002.**

Udžbenik *Gramatika engleskog jezika* autora prof. dr. Mustafe Tanovića objavljen je 2002. godine u izdavaštvu Fakulteta humanističkih nauka Univerziteta «Džemal Bijedić» u Mostaru. Knjiga je napisana u devet poglavlja i sadrži dvije stotine i sedamnaest (217) stranica.

Ova kratka gramatika, kako je sam autor naziva, namijenjena je studentima engleskog jezika Fakulteta humanističkih nauka, ali se njome mogu koristiti i studenti drugih studijskih usmjerenja, kao i učenici srednjih škola. U njoj su sadržana osnovna pravila engleske gramatike koja studentima pružaju čvrst temelj za dalje i dublje proučavanje ovoga jezika.

Kroz devet poglavlja Gramatike autor obrađuje osam vrsta riječi (glagole, imenice, članove, pridjeve, zamjenice, priloge, brojeve i prijedloge). Najobimnija poglavlja jesu poglavlje o glagolima i poglavlje o imenicama. Svako gramatičko pravilo, pojašnjeno u knjizi, popraćeno je nizom vježbi i, što je još važnije, velikim brojem primjera. Ovo posljednje ustvari jeste ta bitna karakteristika zbog koje knjiga dobija na značaju.

Odmah nakon detaljno objašnjenih glagolskih vremena i imenica, autor prelazi na članove, izrazito frekventne riječi u engleskom jeziku, i to ističe kao dovoljan razlog da im se posveti puna pažnja. Zatim slijede pridjevi, a nakon njih poglavlje o zamjenicama. Budući da se naše zamjenice u engleskom jeziku ujedno ponašaju i kao pridjevi, drugim riječima imaju dvostruku funkciju, one su kao takve i tretirane na dva načina: kao zamjenice ili kao pridjevi. Shodno tome, autor je ovom pitanju posvetio zasebno poglavlje. Nakon toga autor obrađuje priloge, brojeve i prijedloge, koji su, također, detaljno objašnjeni i potkrijepljeni nizom primjera.

Na kraju, treba ponovo i posebno naglasiti da ova knjiga može poslužiti širem krugu čitalaca da steknu temeljna znanja iz gramatike engleskog jezika i to kroz svoja eksplicitna objašnjenja, metodički obrađene primjere i dodatne napomene. Ona je rezultat autorova dugogodišnjeg iskustva stečenog radom na osnovnoškolskim, srednjoškolskim i visokoškolskim ustanovama, kao i odraz života i rada u engleskom govornom okruženju. Mišljena sam da ova Gramatika engleskog jezika zasigurno zaslužuje svoje mjesto u ličnoj biblioteci

Aida ĆORIĆ: Mustafa Tanović: *Gramatika engleskog jezika*

svakog studenta engleskog jezika, ali i svakog drugog pojedinca koji iz više razloga treba poznavati ovaj svjetski jezik.